





續藏書卷二目錄

開國名臣

金陵陳靜誠先生遇

洪武八年卒年六十五

青田劉文成先生基

附子璉璟

別見遜國名臣

鐵冠道人張中先生

建昌周顛仙先生

學士浦江宋文憲先生濂

洪武十四年卒年七十三

義烏王忠文先生偉

洪武五年死節雲賜謚自先生始



附 子與孫

別見遜國名臣

宜興吳忠節先生雲

洪武四年卒

姑熟郡公當塗陶先生安

附 太平知府李公習

史中丞章先生濫

附 子存道

酒宋文恪先生訥

詞集劉子高先生崧

祭酒陶公凱

附 崔亮 楊訓文

尚書詹公同

附 子詹公徽

大學士吳公伯宗

大學士吳公沉

大學士朱文恪公善

附 鮑恂 余詮 張紳 張長年 貝瓊

太子少保唐公鐸

尚書開公濟

祭酒樂公韶鳳

附 趙奎 王才

魯文質

陳旭

陳友

學士劉公三吾

太師蹇忠定公義

別見靖難名臣

太師夏忠靖公原吉

別見靖難名臣

太保黃忠宣公福

別見靖難名臣

大學士解公縉

別見內閣輔臣

少保黃文簡公淮

別見內閣輔臣

韓國公李善長

洪武二十三年賜死年七十一

口錄終

續藏書卷二

開國名臣

金陵陳靜誠先生

公名遇字中行，曹人。先世義甫，宋翰林學士，徙居建康，因家焉。大王父執中，淮南諸路兵馬都統制。王父文德，溧陽縣判。父辛之，元淮南鹽課提舉。公資稟純粹，識度超遠，博通經史，尤邃先天之學。元末，爲江東明道書院山長，扁所居之室曰靜誠。人稱靜誠先生。高皇帝渡江，御史秦元之薦公。學識不羣，因以書聘。

之曰予因胡元入馭海宇瓜分豪傑兵爭干戈四起
予提兵東渡遂取臺城歷思自古英雄創業誠難獨
理和門雖多將士帷幄尚乏主持恒側席以求賢冀
詢謀而開國比聞先生世居江左名德鬱然學貫三
史六經博覽兵書百技才兼文武超越等倫賢哲天
生實我良輔昔湯文魯徵伊呂先主猶聘孔明予不
敢以前代明王自期先生當以伊呂孔明爲法儻以
生民爲念應天順人敷陳遠略非欲奮武實以安民
助成大業列爵胙土子孫傳襲與國終始豈不偉與

袂。族。車。塵。起。展。素。蘊。蓋。丙。申。四。月。八。日。也。旣。見。與。語。
大。悅。運。策。帷。中。日。見。親。信。幸。其。第。者。三。諸。計。畫。多。秘。
不。傳。甲。辰。上。卽。吳。王。位。賜。冠。帶。授。供。奉。司。丞。不。受。
戊。申。上。卽。帝。位。公。陳。治。道。以。復。中。國。先。王。禮。教。爲。
首。務。三。授。翰。林。學。士。皆。不。受。乃。賜。肩。輿。一。衛。士。十。人。
護。其。出。入。洪。武。庚。戌。春。嘗。奉。命。至。浙。江。還。朝。密。有。
所。陳。賜。白。金。彩。段。除。中。書。左。丞。力。辭。辛。亥。召。對。華。
蓋。殿。賜。坐。命。草。平。西。詔。授。禮。部。侍。郎。兼。弘。文。館。大。學。
士。復。辭。時。西。域。進。馬。甚。奇。公。見。之。引。漢。故。事。爲。諫。

上大悅，賜大銀一錠，除太常少卿。又辭。上曰：士有志節者，不以功名關懷。朕不强卿以成卿之名也。自是每燕閒，輒召問保國安民大計。時功臣蒙譴者多，公力爲救解，多所全釋。上嘗諭曰：先生有子，令帶刀侍朕，對曰：臣三子皆幼，俟其成立，圖補報。上說，賜兼金對衣。當是時，上之寵禮諸公侯卿大夫，無敢望者。甲子秋，病作，醫療踵至，尋卒。上震悼不已，遣官賻祭，加東園祕器，賜葬鍾山。上所賜詩文翰墨甚多，并公著述，嘗燬于火。今略見世德錄云：弟中

復嘗隨公侍

上永樂中翰林待詔善繪事子欽

早卒恭由鄉貢仕至工部尚書文章政事克世其家
鄭端簡曰上以武功創業顧喜接耆儒時江西鉛
山龔敦學博行淳鄉鄙人皆向慕之國初以明經
爲府學教授御史葉孟芳薦之徵至京洪武十三年
秋上坐武英殿西廡見諸儒使言志皆曰不敢上
負聖主自棄明時上大喜始制四輔官以王本
杜佑龔敦爲春官杜敦趙民望吳源爲夏官秋官冬
官缺令兼攝杜敦壺關人勤苦力學精通易書詩吳

源興化府儒學教授與王本俱以儒士行誼著聞

李贄曰夫子曰不在其位不謀其政此常理也然
世間固有謀其政而不在其位者則常理之所未
有從古之所未有而于靜誠陳公僅見之矣後此
若姚恭靖亦丁謂能處身於遇主之際者而戀戀
一少師之炊終身役役于殿陛而不肯去則亦稍
優于劉誠意而已矣其視公不太遠乎嗚呼胡惟
庸之藥不待嘗也天官之九級不待歷歷下上也
故吾以陳靜誠爲我朝名臣之第一人也

青田劉文成先生

公名基字伯溫處州青田人少穎悟絕羣讀書過目輒誦善經學工屬文旁通天官陰符家言元末舉進士授瑞州高安丞故秘書監揭傒斯見而奇之曰子魏玄成流也而英特殆過之應行省辟與幕僚議不合投劾去再補江浙儒學副提舉充考官復論御史失職受臺抨再投劾歸乃與魯道元宇文公諒日縱酒呼博遊武林汧西湖見異雲起西北衆皆謂慶雲公獨引滿不顧曰此天子氣也應在金陵十年後有

王者起其下我當輔之西蜀趙元澤復奇公曰公乃受魏玄成目邪非諸葛武侯未易當也方谷珍反海上省憲舉公爲行省都事谷珍知不能抗乃使人浮海至燕以重賂賄元用事者下有司招撫授谷珍以官公言賊弱易與今不除乃厚撫之益長賊計用事者以先入谷珍賂大怒謂公失天子憫念元元至意當斬羈管紹興路公感憤慟哭流血欲自殺賴門人密理沙等力阻得不死自是放浪紹興諸山水所遊必有記又多爲歌詩自適而谷珍益橫肆不可制益

所在蜂起行省乃復以都事委公公受兵且撫且討
寇悉平是時石抹宜孫爲樞密院判負義幹公與之
相犄角軍聲大振自樞密經歷遷行省郎中而用事
者右方氏僅以公故儒學副提舉資遷總管府判公
旣左轉又失兵乃納告身庭中拜曰臣不敢負世祖
皇帝無所措足矣遂逃歸青田山著郁離子十卷以
見志衆避谷珍多依公自保會太祖已下金華定
括蒼公置酒延客指乾象示之曰此豈人力也邪會
上使孫炎以金帛來聘公乃付其衆於弟囑曰衆善

保境毋爲方氏所窺卽日同章濫葉琛間道走金陵
呂謂濫琛吾西湖言驗矣旣見上陳時務一十八

策上大悅俄陳友諒傾國入寇壓金陵軍勢張甚

上欲發兵禦之而衆恒擾不決有請背城借一者有
以鍾山王氣請奔據者有勸納款者公後至獨張目
不言上爲起入內趣召公公言先斬主納款及奔
鍾山者上固問計安出乃曰賊驕矣誘之深入而
伏兵徼取之故易易耳取威定霸在此舉而言納款
及奔何也上于是決筴誘破友諒盡覆其衆以克

敵賞酬公。公辭不受。時

上雖以定江東稱

吳

公而中書省設小明王座。猶奉韓林兒。公怒罵不拜。曰。何爲奉牧豎者爲。上陳天命所在。上感悟。始定征討大計。師攻友諒之皖城。不下。公謂彈丸地。何足久勞師。友諒膽破矣。急進薄江州。彼必遁江州下皖城焉。往友諒果遁。都督馮勝攻某城。上使公授之方畧。公以一赫蹏封曰。夜半出兵至某所。見某方青雲起。卽設伏。頃有黑雲起者。賊伏也。勿輕動。日中見而黑雲漸薄。回與青雲接者。賊歸也。銜枚躡其後。

擊之。可盡擒也。勝啓讀。亦未敢信。已而青雲黑雲起。具如公言。遂奉而破賊。取其城。友諒之丞相胡廷瑞。使其子請以洪都降。有所要質。上難之。公從後蹴所坐胡床。上悟而許。洪都下。前是公以母喪告歸。上固留不得行。至是復申前請。始許。公至衢。而苗軍叛。殺金華括蒼守將胡大海耿再成等。衢人洶洶。其將夏毅憂甚。迎公入。衆卽帖伏。公爲移書諸屬邑。俾固守。俟邵平章之兵。而悉誅諸叛將。公治葬畢。因騰書宣。上威德以示方氏。方氏遂請降。俄驛召還道。

建德而張士誠來寇李文忠時爲帥奮欲擊之公
勿擊曰三日後必走走而尾之可盡擒也三日公登
城望曰賊走矣衆見其壁壘旗幟如故且聞嚴鼓聲
莫敢發公復趣之至其所則空壁所留皆老弱追而
薄之東陽悉獲其衆公入謝上從容問曰吾欲取
陳友諒張士誠而鯁生謂士誠密邇且富而弱宜先
若爲我策之公對曰陳氏據上游竊名號乃心無日
忘我此不宜久蘊崇之取陳氏士誠則囊中物矣會
友諒復攻洪都上遂率師迎敵之大戰于彭蠡湖

雖小利、尚未決、公請移軍湖口、以金木相犯、日決勝、陳氏遂平、是時張中亦在師中、所謂鐵冠道人者、臨川人、其于破友諒、筭尤神絕、他占驗亦稱是、愈於公謀斷、勿如也、置太史令、秩正二品、公領之日、中有黑子、公奏東南當失一大將、俄而叅軍胡深伐陳友諒、敗沒、上方欲刑人、而公適入、亟語之夢、以頭有血而土、傳之故、欲應之、公曰、頭上血、衆也、傳以土得衆、且得土也、應在三日、上爲停三日、待之、而海寧降、上大悅、悉以所停囚付公、縱歸里、熒惑守心羣

下皆惴惴以 上且有加僂公密奏宜下書罪已以
回天意 上許之衆乃安大旱 上特命公諗滯獄
甫決雨隨澍時公寢爲 上所信嚮所言無不聽
上卽位擢御史中丞領太史令如遇諸大典封賞冊
拜皆公與左丞相李善長學士宋濂計定爲之時處
州七縣糧當加於宋歲額五升而 上獨令青田僅
以五升爲額曰令鄉里子孫世世頌劉伯溫也時左
丞相李善長貴盛公獨事與抗議不相下善長不能
平適善長以事見譴憲使凌說因彈之公言李舊勲

且能輯和諸將

上曰是數欲害汝汝乃爲之地邪

汝忠勲足任此公頓首曰是如易柱必得大木乃可

若束小木爲之將速傾覆臣駑鈍豈堪此

上乃欲

相中書左丞楊憲復問公公素與憲善對曰憲有相

才無相器又問右丞汪廣洋曰此褊淺殆甚于憲叅

政胡惟庸何如曰用之債轅破犁犢也

上曰吾固

難之吾之相終無逾先生公對曰臣非不自知臣疾

惡太甚又不耐繁劇其後憲以怙寵廣洋以巽懦惟

庸以大逆皆不良歟會

上幸鳳陽公與左丞相居

守請于

上謂宋元以寬縱失國且今刑亂用重

使紀綱肅而後惠政可施乃飭諸御史一切按劾權

倖無所避中書省都事李彬坐貪縱見法丞相以彬

省察且素暱之請公緩其獄公不聽獄具馳奏報可

卽斬之丞相大恚恨俟上歸訴公盛夏祈雨僂人

於壇壝之下非所以奉承天意上惜公持其章不

下而風公以病請告就醫青田時洪武四年也時

上再幸鳳陽有欲建中都之意又銳欲出塞滅王保

保公瀕行謂中都曼衍非天子之居王保保不可輕

保公瀕行謂中都曼衍非天子之居王保保不可輕

明年大封功臣、手詔叙公勲伐、召赴京、命兼弘文館學士、已封其祖父皆永嘉郡公、乃封公開國輔運、守正文臣階資善大夫、上護軍、誠意伯、勲級猶二品、而祿二百五十石、僅得忠誠伯之半、又明年復予告歸里、公旣歸、猶上章問起居、撰賀平蜀頌、上優詔答之、嘗爲上陳甌閩事、蓋甌括之間有隙地曰淡洋、其南抵閩界、曰三魁、爲巇盜藪、方氏所由亂、公奏于其地立巡司以控扼之、其姦勿便也、相率挾逃、戍之、卒以叛、大豪復陰主之、公時使其子璉上奏而

不先白中書省。胡惟庸左丞攝相事。銜公舊語。使刑部劾公。欲購淡洋地爲自墓。不得。則創立司之說。以窘其人。致激變。疏上不問。復請逮其子璉。又不問。而第令移文使公知。奪其祿。伯爵如故。公馳入朝見上。但引咎自責。不敢言歸矣。惟庸俄代廣洋爲右丞相。覘上之念公怠。乃陽爲好者。以八年正月朔挾醫來視疾。公飲之。再覺有物積胸中。如拳石。又三月浸劇。上使問之。知不能起。乃爲文以贈。給驛舟護歸青田。亡何竟卒。年六十五。公且卒。以生平所習天

文秘書封授于璉曰服闋亟上母令後人習之爲書
勸上修德省刑祈天永命且寬猛若循環毋持一
端諸形勢要害之地宜宿重兵與京師形勢相連絡
授其次子仲璟曰惟庸方在事上之無益不久必
敗敗則上必思我其時可密聞也公爲人剛毅有
大節慷慨敢言遇天下利害果毅奮發不復反顧而
揣摩事計多中其于天文尤懸斷不爽若鬼神初
上禮重之呼老先生而不名又時時謂人伯溫吾子
房也然卒不以爲相封拜亦輕最後恩禮亦漸薄

人以為中惟庸間云洪武十三年上誅左丞相陳庸等果復思公言召其子璉拜考功監丞遷江西右叅政蚤卒二十三年召璉子廌復故封誠意伯歲祿五百石予世襲二十五年卒子法幼而璉弟仲璟奏公遺疏拜閣門使遷谷王右長史靖難師起谷王開金川門降而仲璟獨不屈下獄法亦停襲法子樞孫曇曾孫祿至景泰中上思公功授世襲翰林五經博士子憲前卒孫瑜至弘治中因給事中吳士偉言晉授處州衛指揮使正德九年賜誥曰劉基學

爲帝師才稱王佐。孔明之任。豈間人言。敬輿之謀。不負所學。占事考祥。明有徵驗。運籌畫策。動中機宜。渡江策士無雙。開國文臣第一。受爵能讓。懷辭金蹈海之風。成功不居。從辟穀封留之請。可謂明哲允矣。清貞特贈爾爲太師。謚文成。嘉靖十八年。刑部郎中李諭言。臣鄉人劉基宜侑享。高廟世其封爵。如徐達。上是諭言。下廷議。皆言。高帝收攬賢豪。創造基業。一時佐命功臣。並軌宣翼。而帷幄奇謀。中原大計。身每屬基。故在軍有子房之稱。剖封發孔明之喻。基上

之後孫薦實嗣之。太祖嘗召諭再三。鐵券丹書。言
言世祿。薦嗣爵未幾。旋卽隕世。禡圭裳於末裔。委礪
帶于空言。或謂後胤孤貧。勿克荷負。或謂長陵紹
統。遂至疎嫌。雖一辱塗泥。傳聞多謬。而載書盟府。績
效具存。昔者武王興滅。天下歸心。成季無後。爲善何
勸。基宜侑享。太廟其九世孫指揮使瑜。宜嗣伯爵。
伏惟聖明裁定。制曰可。公入祀太廟。廡中瑜
誠意伯食祿七百石。與世券二十年。瑜卒。子世延

李禿翁曰。公中忌者之毒。以太直故。晚而。上之。顧寢薄以剛。故其不肯爲子房之和光同塵。曲已藏身明矣。此。八品識見。實居留侯之前。而世人惑于聞見。反以公爲不逮子房。非也。一進一退。自有定數。一勝一負。自有定時。而況于生歿大事也。迷者俟命而行。達人知天已定。公旣精曉天文。安有不知已之歿日。在洪武八年而已歿之年。僅六十又五也。今觀公之封天文科書。以授子璉也。且責令璉亟上之矣。又爲書以授次子仲璟。而曰必

待惟庸敗後乃可密聞至十三年上竟誅惟
累坐夷滅者數萬果思公言召璉而拜官遂卒孫
薦繼之襲封誠意伯增祿五百石且予世券公一
時剛直之所貽也不可以觀乎而仲璟復奏公遺
疏拜閣門使璉與薦咸卒於洪武二十五年之前
而仲璟獨著節于靖難之後公爲開國功臣第一
仲璟爲靖難忠臣世濟其美孰謂公之獨授書於
仲璟也爲無意哉故曰皆天也公唯知天而已不
然何貴於知天文

楊文懿公曰子房不見詞章玄齡僅辦符檄公勲業造邦文章傳世可謂千古人豪或疑公逮事胡元專門象數何異訾伊尹之屢就恨周公之多才也子璉有文行方上手書問天象公條荅言霜雪之後必有陽春今國威已立自宜少濟以寬或言有殺運三十年者公慨然曰使我任其事掃除弊俗一二年後寬政可復彼難星已過勸上急移他舟者特星官之一技耳而烏足以槩先生與

附建昌周顛仙先生

太祖高皇帝御製文曰顛仙姓周自言南昌屬郡建昌人年一十四歲入南昌乞食于市元至正間忽入撫州未幾仍歸南昌歲將三十凡新官到任必謁見而訴之其詞曰告太平不數年元天下大亂所在英豪據險其稱僞漢陳友諒者帥烏合之衆以入南昌顛不與語未幾朕親帥舟師復取南昌城降朕撫民既定而歸忽於南昌東華門道左見男子一人道傍朕謂左右曰此何人也左右皆曰顛人朕三月歸建

業顛者六月至朕親出督工逢顛者來謁謂顛曰此來何爲對曰告太平如此者每出則逢之所告如前或左或有或前或後務以此言爲先有時遙見以手入胷討物置口中問其故曰虱子曰幾何對曰二三十當首見時卽言婆娘反又鄉談中常歌云世上甚麼動人心只有臙脂胚粉動得婆娘嫂裏人及問其故對曰你只這般只這般每每如此及告太平終日被此顛者所煩特以燒酒醉之暢飲弗醉明日又來仍以蠶多爲說於是製新衣易之顛者舊裙腰間藏

三寸許菖蒲一莖曰此物何用對曰細嚼飲水腹
痛朕細嚼水吞之是後顛者日顛不已命蒸之初以
巨缸覆之令顛者居其內以五尺圍蘆薪緣缸熯之
薪盡火消揭缸而視儼然如故是後復蒸之以五尺
圍蘆薪一束半以缸覆顛者于內煅煉之薪盡火消
揭缸視之其烟凝於缸底若張綿狀顛者微以首撼
撼小水微出卽醒無恙命寄食於蔣山寺月餘僧來
告顛者有異狀與沙彌爭飯遂怒不食今半月矣朕
命駕親往視之至寺遙見顛者來迎步趨無難容無

饑色、因盛殺修同享于翠微亭膳後、朕密謂主僧曰、
令顛者清齋一月、以視其能否、主僧如命、防顛者于
一室、朕每三日一問、問至二十有三日、果不飲膳、朕
親往開之、諸軍將士爭取酒肴以供之、大飽皆不納、
所飲食者盡出之于地、良久召至、朕共享食、如前納
之、弗出、酒過且酣、先於朕歸、道傍側立待朕至、顛者
以手畫地成圈、指謂朕曰、爾打破箇桶、做箇桶、又閑
中見朕、常歌曰、山東只好立一箇省、未幾朕將西征、
九江問顛曰、此行可乎、應聲曰、可、朕謂顛曰、彼已稱

帝今與彼戰豈不難乎顛者故作顛態仰面視屋上久之穩首正容以手拂之曰上面無他的朕謂顛曰此行爾偕往可乎曰可兵行帶往至皖城無風舟師難行顛乃曰只管行只管有風無膽不行便無風於是諸軍上牽以船薄岸泝流而上不二三里微風漸起又不十里大風猛作揚帆長驅遂達小孤當中流江豚戲水顛者曰水恠見前損人多伴者來報朕不然其說顛果無知棄溺于江中至湖口食訖人數約有十七八人將顛領去湖口小江邊意在溺死去久

而歸顛者同來問何不置之死地對曰難置之于死地語未旣顛者猝謂朕欲食朕與之食食旣顛者整頓精神衣服之類若遠行之狀至朕前鞠躬舒項謂朕曰爾殺之朕謂曰被爾煩多且縱你行遂糗糧而往去後莫知所之朕于彭蠡之中大戰之後回江上星列水師以據江勢暇中試令人往匡廬之下詢土居之民要知顛者之有無地荒人無唯太平宮側草莽間一民居之對曰前者俄有一瘦長人物初至我處聲言好了我告太平了爾爲民者用心種田後于

我宅內不食半月矣深入匡廬莫知所之朕戰戰
來癸卯圍武昌甲辰平荆楚己巳入兩浙戊申平吳
越下中原兩廣福建天下混一洪武癸亥八月俄有
赤脚僧名覺顯者自言于匡廬深山岩壑中見一老
人使我來謁 大明天子有說問其說乃云國祚殷
廷儀禮司以此奏朕思馭宇內至尊於黔黎之上奉
上下兩間善聽善見恐貽民笑故不見答是僧伺候
四年仍往匡廬意在欲見又四年朕患熱症幾將去
世俄爾赤脚僧又至言天眼尊者及周顛仙人遣某

送藥朕初又不欲見少思之既病人以藥來雖假合
見之出與見惠朕以藥藥之名其一曰溫良藥二片
其一曰溫良石一塊其用之方金盆子盛著背上磨
著金酸子內喫一酸便好朕服之初無甚異初服在
未時間至上燈時周身肉內搐掣此藥之應也當夜
病愈精神日強一日服過二番乃聞菖蒲香酸底有
丹沙沉墜鮮紅異世有者其赤脚僧云某住天池寺
內去岩有五里餘俄有徐道人來言竹林寺見詩某
與同往見天眼尊者坐竹林寺中少頃一披草衣者

入請天眼尊者此何人詩曰卽今人主詩又問曰詩
將視看對曰已寫于石上觀之果有詩二首朕謂赤
脚曰還能記乎曰能卽命錄之初見其詩粗俗無韻
無聯似乎非詩也及遣人詣匡廬召取之使者至查
然矣朕復取是詩再觀其詞其字皆異尋常不在鐫
石字耳國之休咎存亡之道已決矣故記之以示後
人

學士浦江宋文憲先生

公名濂字景濂浦江人姪七月而生六歲能詩歌稍長文學益著初爲翰林國子編修辭入龍門山著書庚子徵至金陵除江南儒學提舉授太子經壬寅召講春秋左氏傳甲辰改起居注侍左右明年侍上諭黃石公三畧又明年乞歸省賜金帛太子贈有加還家箋謝上書太子上覽書喜召語太子書意洪武二年徵總修元史除翰林學士知制誥兼修國史時甘露屢降上問災祥之故對曰受

命不於天於其八休符不於其祥于其仁 上嘗

言古帝上當宴安之餘多好神仙朕謂國治民安心

神恬康即仙對曰漢武帝好神仙而方士至梁武

帝好佛而異僧至使移此心以求賢天下有不平乎

三年坐議孔廟禮謫安遠知縣未幾召爲禮部主事

五年陞太子贊善大夫 上問帝王宜讀何書公請

讀真德秀大學衍義 上立取覽說之令大書揭兩

廡壁六年 上坐于西廡賜各大臣坐令公講大學

衍義司馬遷論黃老事講畢 上曰朕上畏天地下

畏兆民兢兢業業不敢自逸公離席頓首曰天下
甚陞待讀學士兼贊善大夫令集歷代奸臣事爲辨
奸錄分賜太子諸王又命序祖訓纂大明日曆
七年日曆成一百卷又擇言行之大者爲寶訓五卷
爲序上之公侍上久多所陳說直諒不務文飾
上喜曰卿可參大政對曰臣無他長徒以文墨議論
事上怒言小辭每燕見坐賜茶詢舊章講治道甚
條析至問廷臣藏否第言其善者公深密不洩禁中
語有言某事某事害大書溫樹二字室中或問朝廷事

指二字

一三強公飲醉歡笑賦楚辭一章令侍臣

咸賦醉學

上歌曰後世知朕君臣同樂也九年除翰

林學士承旨知制誥兼修國史

上曰朕起布衣爲

天子卿自草萊列侍從爲開國文人之首俾世世與

國同休不亦美乎令

太子選良馬賜公又爲良馬

歌以賜時有上萬言疏者

上怒其迂衍罪且不測

問羣臣阿意者輒指其疏此不敬此詆謗

召公問

對曰彼應

詔上疏本效忠無他

上復覽疏顧有

足采者

召罵阿意者曰若等激吾怒何異以膏沃

火向非宋景濂幾不誤罪言者。上嘗廷諭公曰：古
人太上爲聖，其次爲賢，爲君子。若景濂事朕十九年，
口無毀言，身無飾行，寵辱不驚，始終無異，不謂君子
人乎？匪唯君子，抑可謂賢矣。十年致仕，賜緡綺御
製文集。太子贈衣二襲。上曰：朕最慎賞嘉卿忠
誠，故以賜卿。卿今年壽幾何？曰：六十八歲。上曰：藏
此綺二十二年，作百歲衣。公頓首謝。公辭歲請一朝。
是年九月入朝。上廷問公屢矣，及至大喜。日侍
上游，歷觀闕下，旋禁籞，便殿侍食，日晏始退。上嘆

曰純臣哉爾濂方今四夷皆知卿名卿自愛歲暮辭
還旣行數日。上問公子璲曰朕疇昔之夜夢爾父
笑談若曩時璲曰非。陛下垂念臣父何以形之夢
寐日本使奉勅請文獻百金卻不受。上問公對
曰天朝侍從受小夷金非所以崇國體十二年冬
孫眞坐法論死公罪且不測太子力救得釋安置茂
州十四年五月行至夔卒年七十三歲門人方太史
曰當元之衰據名號爭雄中國者十餘人皆莫能得
士。太祖定都金陵獨能聘禮太史公公始見卽勸

不嗜殺人論道

上前授經

太子未嘗不言仁義

天下既定

上方稽古制治凡郊廟山川祠祀律歷

禮樂夷裔貢齎諸禮文大政皆太史公裁定太子

寬大仁明天下歸心愛戴太史公之功居多海外諸

夷朝貢接國門至必問太史公安否公墓初在夔永

樂十一年孫恪以蜀獻王命遷葬華陽置祀田正德

中謚文憲濂二子長璿璿子三人愼愷恂皆無後次

遂爲中書舍人子三人慤愷恪居華陽懌字子夷

奉母孝獻王時調粟帛懌力學攻書建文召入翰

林爲侍書

李贄曰 上問公何以不受乞文之餽公對曰

天朝侍從受小夷金非所以崇國體予謂公失對矣公亦不宜待問而後對也方請文時公卽宜疏列其事言屬國遣使求文須奏請 天朝待 皇

上允許勅令某臣撰作乃敢作臣等旣奉 勅而

後撰文則日本必不可有所餽而得文也若受其餽卽爲私交願 聖上頒降撰文而令來使齎還所餽之金如此則 朝廷尊嚴小國懷畏 聖上

必且大喜矣而公何不知也予觀上之曲宴公
嘗歎曰純臣哉而濂今四夷皆知卿名卿自愛鳴
呼危哉斯嘆芒刺真若在背而公又尚不知何也
已告老而歸仍請歲歲入朝欲以醉學士而奉
魚水此其意不過爲子孫宗族世世光寵之計耳
愛孫之念太殷也孫慎怙勢作威坐法自累則公
實累之矣且并累公則亦公之自累非孫慎能累
公也使旣歸而卽杜門作浦江叟不令一人隸於
仕籍孫輩亦何由而犯法乎蓋公徒知溫室之樹

不可對而不知殺身之禍固隱于魚水而不在溫
樹也俗儒亦知止足之戒徒守古語以爲法程七
十餘歲歿葬夔峽哀哉

義烏王忠文先生

公名禕字子充義烏人幼秀爽奇敏及長長身山立
屹有偉度習古學師事黃潛戊子元政亂公爲書七
八千言上時宰危素張起巖並薦不報隱青巖山著
書戊戌徵公署中書省掾商略幾務上每稱子充
不名間與論文章稱善因命采故實爲四言詩授
太子辛丑進平江西頌上覽頌喜曰吾固知浙東
有二儒卿與宋濂耳學問之博卿不如濂才思之雄
濂不如卿癸卯授江西儒學提舉司校理外艱乙巳

除侍禮郎兼引進使定議禮制遷起居注丙午升同知南昌府祿披榛莽建府署撫瘡殘集徙散收廩賢士搜除奸蠹經理廢壞郡得安輯賜黃金帶丁未召議卽位禮忤旨洪武元年降漳州府通判尋上疏言上天以生物爲心雷霆霜雪有時而搏擊有時而肅殺然皆暫而不常向使雷霆霜雪無時不有則上天生物之心息矣洪武二年召修元史爲總裁官徵逸士汪克寬胡翰宋僖陶凱陳基趙增魯魯高啓趙汴張文海徐尊生黃篴傅恕王錡傅著謝德十六

人爲纂修官、開局天界寺公史事、擅長裁煩剔穢、
任筆削、書成拜翰林待制、同知制誥、兼國史院編修
官、三年預教大本堂、公經明理達善、開道召對殿廷、
必賜坐、從容宴語、未久奉使土蕃、尋召還、五年往
諭雲南、六月至、諭梁王亟宜奉版圖歸職、方不然、
天討旦夕且至、梁王不聽、館別室數日、又諭曰、朝
廷以雲南百萬生聚、不欲殲于鋒刃、曾不聞元綱解
紐、天兵西征、不五六年、天下大定、爾恃險遠、旅拒
明命、龍驤鷁艦、會戰昆明、悔無及矣、梁王駭服、有降

意卽爲改館。會元遣使脫脫至雲南。覘梁王有二心。欲迫殺我使。以固其意。梁王持兩可。不決。匿公民間。脫脫聞之。謂梁王不得已。出公與脫脫相見。脫脫欲屈公公罵曰。天訖汝元命。我朝實代之。汝如燭火。余燼尚欲與日月爭光耶。我將命遠來。豈爲汝屈。有死而已。顧梁王曰。汝朝殺我。大兵旦夕至。六年十二月竟被害。瘞地藏寺。北年五十二。子紳字仲縉。博學能文。洪武二十九年。走雲南求父遺骸。不得。述滇南勦哭記。建文元年四月。紳上言父死節狀。下翰林議。

贈公翰林院學士奉_武大夫謚文節正統六年又
公翰林學士謚忠文公歿之明年宜興吳雲使雲南
雲字友雲敏達善詞賦洪武初以故官召授弘文
館校書郎改渭南丞有善政歷升刑部郎中磨勘司
令刑部尚書出爲湖廣叅政坐事被逮上憐其才
釋之謂雲曰雲南未奉正朔卿能爲朕作陸賈乎對
曰天命所在誰能違之臣奉威德告以大義彼必附
順若冥頑不從興師未晚七年九月遣行會雲南使
鐵知院等二十人使漠北爲我獲上釋二十人與

雲俱至沙糖口二十人者謀曰吾屬奉使不達中道
被執而還罪必死共說誘雲令胡服辮髮詐爲元使
者又逼令改制書共給梁王雲不從以死自誓竟
被害梁王遣人收雲骨葬蜀給孤寺子鞭以雲死事
得入國子監弘治中徐文靖公言于朝贈刑部尚
書謚忠節與公並祠雲南嘉靖中又官其魯孫承宗
中書舍人

姑孰郡公當涂陶先生

公名安字主敬當塗人少敏悟有大志博涉經史元
書院山長乙未與耆儒李習率父老出城迎上召
語時事公曰今豪傑爭雄志在子女玉帛非有撥亂
救民安天下之心明公率衆渡江神武不殺人心悅
服以此順天人行弔伐天下不足平也上曰善吾
欲取金陵何如對曰金陵古帝都龍蟠虎踞限以長
江據其形勢出臨四方何向不克上又曰善留叅
募府習知府太平未幾公爲都事丙申從克金陵升

左司郎中贊機務。既而得劉宋章葉四公。上問四人者何如。對曰。臣謀畧不如基。學問不如濂。治民之才不如益琛。辛丑。知黃州。寬賦省徭。招來流亡。民庶悅服。甲辰。移知饒州。賜詩以行。時征伐用急。公善諭民。樂輸軍興。不乏歲。乙巳。信州賊攻城。公與千戶宋炳率吏民分城拒守。選卒爲遊兵。晝夜巡捍。公登城諭賊曰。爾皆吾民。反爲賊用。得無失計乎。衆曰。使皆如太守。豈有今日。城卽破。不相害。會援兵至。賊大敗遁去。諸將怒。請盡屠從賊者。公曰。民爲賊脅。奈何。

殺之不許、明年入朝。吳元年初置翰林院、召爲學士、知制誥、兼修國史。時召四方宿儒、集議禮制。公總裁定、修律、爲議律官。洪武元年、上嘗賜公對國朝謀畧、無雙士。翰苑文章第一家。御史有言公隱過者、上曰、朕素知安安、豈有此、且爾何從知。對曰、聞之道路。上曰、御史取道路言、毀譽人、以此爲盡職可乎。立黜御史。初置山東行中書省、調江西行省叅政汪廣洋、山東公出江西爲叅政。上曰、朕渡江初、卿首率父老見軍門、爲朕陳王道、論時務、深合朕心。朝夕

幕府裨益良多。繼入翰林。益聞讜論。江西上游都會。擇卿撫治。公寬仁達吏事。政績益著。四年卒。年五十七。疾劇。猶草上時務十二事。贈姑熟郡公。國初諸禮多定大禮。公裁定。大配禮。專用公議。祫禘禮。定於詹同齋戒禮。永升。五祀禮。崔亮。朝會禮。劉基。祝祭禮。魏觀。軍禮。

陶凱

御史中丞章先生

公名濫字三益龍泉人壬辰蘄黃妖寇犯龍泉執公
從子存仁公憐存仁幼願代之賊聞公名大喜問計
公正色曰若等皆有父母妻子顧爲此滅族事賊怒
并執公公給守者乘間脫歸集里兵擊却賊上功行
省授龍泉主簿辭結廬匡山又辟地入閩庚子上
徵公及劉宋葉三公至建業問曰我爲天下屈四先
生今四海紛紛何時定乎公對曰唯不嗜殺人者能
一之擢僉營田司事巡行江東兩淮公乞省母病

賜金綺歸、留子存厚

京師浙東始設提刑按察司

公爲僉事、處州總制胡深、出師溫州、還、公守處州、給

餉、平荆楚、移僉事湖廣、荆襄多廢地、議分兵屯田、且

控制中原

上善公言、河內按察使宋思顏、浙東按

察使孔克仁、僉事王濤、坐法、辭連公、憂懼

上曰、予

素知濤守法、毋恐、胡深兵入閩、陷沒、處州幾變、陞公

浙東按察副使、鎮處州、公辭曰、臣往任浙東、無狀、蒙

恩、獨原、卽陞臣官、罪過益重、疆場之事、臣死、不避、副

臬之命、敢辭

上從之、比至、諸山寨已叛、公宣布

詔旨軍民感悅誅首叛者餘悉解散青田福建寇
攻慶元龍泉公守禦却賊茗陽賊寇隣邑遮平陽瑞
安傳道公令子存道合平瑞兵擒賊水軍千戶任惟
淵朱仲欽戍青田賊至仲欽逆戰惟淵走仲欽以無
援故敗公卽斬惟淵以徇温州平請朝京師上
曰卿在邊良苦待平吳卽召卿浙西諸郡平乃召
公王命分兵征閩以存道守處州公入見上諭羣
臣曰盜雖孺臣父子宜力一方寇盜盡平功不在諸
將後因問公征閩諸將對曰湯和由海道進胡廷瑞

自江西入。此必勝矣。然閩中尤服李文忠威信。若令

文忠帥師從浦城取建寧。則萬全計也。上立詔文

忠出師。如公策。溫賊既降。乃授公元帥。還守之。先是

我師征溫。失利。輒叛去。溫既平。又請降。公曰。叛而復

降。納之無法。奏斬賊洪武元年。拜御史中丞。尋兼太

子贊善大夫。公務存大體。不屑細故。或以爲言。公曰。

憲臺百司儀表。居其職者。當先養人廉耻。使避而不

犯。豈直恃搏擊爲哉。上祀社稷。大風雨還坐。外

朝大怒。義典者得罪。且不測。公曰。風雨連朝。無足爲

恠卽禮官失議

皇上誠敬自足昭格願賜寬

遂已存道部鄉兵萬五千從李將軍平閩後復詔

存道兵從海道北征公曰鄉兵本農人始令征閩許

事平歸農今復調北征爽信不可上不應公曰兵

已入閩者俾還州里昔嘗叛逆者宜籍爲軍使北征

自贖則一舉而恩威著矣上曰孰謂儒者迂先生

強爲朕一行公至處乞終母喪不許遣存厚還治

喪公集鄉兵令存道部出永嘉浮海北行三上章乞

終喪得允存道出崑山走京師見上授處州衛指

揮副使戍上黨尋移平陽指揮同知公喪母哀毀疾
作二年卒公性孝友誠確宏偉外若和緩至臨大事
議論爭是非不避權勢必折衷於理存道征陽和遇
虜斷頭山力戰歿





